


YAGONASAN, MUQADDAS VATANIM, SEVGI VA SADOQATIM SENG BAXSHIDA, GO'ZAL O'ZBEKISTONIM!

www.tongyulduzi.uz

Vatan yagonadir,
Vatan bittadir!

N:29-30 (66986-87)

2014-yil
21-iyul



Gazeta 1929-yil 1-avgustdan chiqq boshlagan

O'zbekiston Respublikasi bolalar va o'smirlar gazetasi

ISSN - 2010-6092

— Kitob bizga
doimiy hamroh,
deydi
Qashqadaryo
viloyati, Qamashi
tumanidagi
28-umumta'lim
maktabining
8-«A» sinf
o'quvchisi **Hulkar
XIDIROVA**.



Ushbu sonida:

«NAFOSAT»DA
BIR KUN

2-bet

**BUGUNNING
BOLASI**

4-bet

Ingliz tilini
o'rganamiz!
Let's learn
English!

5-bet

**ABDULQODIR
1-SINFGA
QABUL QILINDI**

7-bet



2-bet

**BUYUK
YURT
FARZANDLARIMIZ**

«YASHIL CHIROQ

2014»

So'nggi yillarda
respublikamizda
bolalar ishtirokidagi
yo'l hodisalarining
oldini olish yuzasidan
keng ko'lamli
tadbirlar amalga
oshirilmogda.

(Davomi 3-betda)



«NAFOSAT»DA BIR KUN

Farg'ona vodiysi o'zining so'lim tabiati bilan respublikamiz viloyatlari ichida alohida o'rin tutadi. Vohaning qadim shaharlaridan biri Qo'qonda bir necha yildan buyon 12-Mehribonlik uyi faoliyat ko'rsatib kelmoqda.

Mehribonlik uyi faqatgina ta'lim va tarbiya beruvchi muassasa bo'libgina qolmay, balki u tarbiyalanuvchining ijtimoiy huquq va manfaatlarini himoyalovchi maskan hamdir. Bunda tarbiyalanuvchilarning yashashi va

N. SULTONOV o'lgan suratlar



ta'lim-tarbiyasi uchun barcha sharoitlar yaratilgan. Hozirgi kunda Rahbarxon Mirzayeva singari fidoyi pedagog rahbarlik qilayotgan jamoa sa'y-harakatlari bilan Mehribonlik uyining moddiy-texnika bazasi kundan kunga mustahkamlanib bormoqda.

Homiylarning beminnat ko'maklari bilan ko'plab xayrli ishlar amalga oshirildi. Jumladan, maskan tasarrufidagi «Nafosat» yozgi sog'lomlashtirish oromgohida oshxona, omborxona, shuningdek, zamon talablariga javob beradigan 100 o'rinli yotoqxona binosi, tibbiy bo'lim yangidan qurilib, foydalanishga topshirildi.

Joriy yil Xalqaro bolalarni himoya qilish kuni arafasida mazkur oromgohda jahon standartlariga to'liq javob beradigan cho'milish havzasi, yuvinish xonalarining barpo etilishi bolalarga munosib bayram sovg'asi bo'ldi.



Mavsum davomida guruhlar o'rtasida «Sog'lom bola – yurt kelajagi», «Shahrim jamoli», «Sog'lom tanga – sog'lom aql», «Kitobim – oftobim», «Kuch – bilim va tafakkurda», «To'p darvoza ichida» hamda «Sening tug'ilgan kuning» mavzularidagi tadbirlar ko'tarinki ruhda o'tkazildi. Tarbiyalanuvchilarning ustozlari boshchiligidagi Buxoro shahriga sayohatlari yanada quvonchli bo'ldi.

Nurbek QIDIRALIYEV

«PESHOG'OR»GA SAYOHAT

Jizzax viloyati, Zomin tumanida joylashgan general Yorulla Norbekov nomidagi bolalar sog'lomlashtirish oromgohida dam oluvchilarning har bir kuni sermazmun o'tmoqda.



Bu yerda hordiq chiqarayotgan 150 nafar o'g'il-qizlarning sho'x-shodon kulgulari bundan dalolat.

Yaqinda oromgohda dam olayotgan bolajonlar tumandagi qadimiy yerosti obida – «Peshog'or»ga sayohat uyushtirishdi.

Sunnatulla Ahmedov boshchiligidagi yosh sayohatchilar Morguzor tog' tizmalari bo'ylab yuqoriga ko'tarilisharkan, tevarak-atrofning yashillikka burkanganligidan diillari yayradi.

Guruh a'zolari mash'ala yordamida ichkariga odimlarkan, g'or sahni kengayib borar, uch-to'rt odim narini ko'rib bo'lmasdi. Ba'zan bolajonlar ensiz va tor yo'laklardan emaklab o'tishlariga ham to'g'ri keldi.

Yosh sayohatchilar g'orning noma'lum bo'shliqlaridan o'tib, yorug'lik sari yaqinlashayotganida quyosh ufqqa bosh qo'yimoqda edi. Ularning safari shu yerda yakun topdi. Shu tobda barchaning ko'nglida xotirjamlik, yuz-ko'zlarida esa mamnunlikni sezish qiyin emasdi...

Eng muhimi, bolajonlar sayohat davomida qadimiy yerosti obidasi sir-sinoati va g'aroyib mo'jizalari bilan yaqindan tanishishga muyassar bo'lishdi.

Abdulla SAIDOV,
Jizzax viloyati

Yaqinda poytaxtimizning Yunusobod tumanidagi 260-umumta'lim maktabida faoliyat yuritayotgan yozgi oromgohda bolajonlarning sportga bo'lgan qiziqishini yanada mustahkamlash maqsadida musobaqa o'tkazildi.

Unda tumandagi umumta'lim maktablari o'quvchilari g'oliblik uchun bahs olib bordilar.

Dastlab 9 yoshli o'quvchilar



chilari g'olib bo'lishdi.

«Biz buyuk yurt farzandlarimiz» shiori ostidagi asfaltga rasm chizish bellashuvida 260-umumta'lim

maktabi o'quvchisi Muhiddin Umirov birinchi, 21-umumta'lim maktabi o'quvchisi Omina Zokirova va 260-umumta'lim maktabi o'quvchisi Anjelina Karimova ikkinchi o'rinni egallashdi. Uchinchi o'rin esa 21-umumta'lim maktabi o'quvchilari – Nafisa va Robiya Qobulovlarga nasib etdi. G'oliblarga homiylar tomonidan esdalik sovg'alari hamda faxriy yorliqlar topshirildi.

Muzaffar AHMEDOV,
M. AZIMOV o'lgan suratlar



o'rtasida estafeta, 10 yoshli o'quvchilarning arqon tortish bellashuvlari hamda 11 yoshli o'quvchilar ishtirokida futbol musobaqasi, 7-8 yoshli o'quvchilar o'rtasida asfaltga rasm chizish bellashuvlari o'tkazildi.

Qizlar o'rtasida bo'lib o'tgan estafeta bellashuvlarida 260-umumta'lim maktabi o'quvchilari g'oliblikni qo'lga kiritishdi. O'g'il bolalar bahsida esa durang natija qayd etildi. Futbol musobaqasida 21-umumta'lim maktabi o'quv-





MUQADDAS GO'SHA

Inson borki, yuragining tub-tubida ona
Vatanga bo'lgan bitmas-tuganmas mehr-
muhabbat, sadoqat mujassam.

Vatan – g'oyatda ulug' tushuncha, uning ma'no-
mazmunini, qadr-qimmatini so'z bilan ifodalab bo'lmaydi.
U tug'ilib o'sgan makon, kindik qonimiz to'kilgan aziz
maskandir.

Men mana shunday jannatmonand yurtida voyaga
yetayotganimdan faxrlanaman.

Zarnigor JO'RAYEVA,
Farg'ona viloyati, O'zbekiston
tumanidagi 38-umumta'lim
maktabi o'quvchisi

(Davomi. Boshi 1-betda)

«YASHIL CHIROQ 2014»

Yaqinda Jizzax
viloyatida bo'lib o'tgan
«Yashil chiroq – 2014»
Respublika yosh
avtonazoratchilar musobaqasi
ham shular jumlasidandir.

Respublika bosqichidagi ushbu tanlovda
Qoraqalpog'iston Respublikasi, Toshkent
shahri va barcha viloyatlardan yosh yo'l
nazoratchilar jamoalari ishtirok
etishdi.



orqali boshqariladigan transportlar harakati», «Yo'l
harakati qoidalarini targ'ibot qiluvchi guruhlarining
chiqishi» kabi turlar bo'yicha o'zaro bellashdilar.
Musobaqa natijalari maydonga o'rnatilgan maxsus
ekranda yoritib borildi. Bu esa bellashuvning adolati
o'tishini ta'minladi.

Tanlov yakuniga ko'ra, 95 ball to'plagan jizzaxlik
qatnashchilar oliy o'ringa munosib
ko'rildi. Poytaxtlik o'quvchilar 92,5 ball
bilan birinchi, Xorazm viloyatidan
kelgan yoshlar ikkinchi,
qashqadaryoliklar esa uchinchi
o'ringa sazovor bo'lishdi.

Slyot davomida YHQ va amaliy
mashg'ulotlarda chuqur bilimga
ega bo'lgan xorazmlik Yulduz
Otabekova, samarqandlik
Nilufar Naimova, buxorolik

Muharram Hasanova hamda poytaxtlik
Nilufar Rixsiboyeva tadbir tashkilotchilarining
qimmatbaho sovg'alari bilan taqdirlanishdi.

Musobaqa yakunida «Yashil chiroq – 2015»
an'anaviy slyoti Samarqand shahrida o'tkazilishiga
kelishib olindi.

Tohir MULLABOYEV,
O'zbekistonda xizmat ko'rsatgan jurnalist



Yo'l harakati qoidalarini targ'ib qiluvchi
bannerlar, turli ko'rgazmalar bilan
bezatilgan oromgohning tadbirlar
o'tkaziladigan maydoni musobaqa
qatnashchilariga o'zgacha shukuh
bag'ishladi. Musiqi sadolari ostida
tanlov ishtirokchilari maydon uzra saf
tordilar, Jamoa sardorlari slyotning
ochilishiga bag'ishlangan tantana
hamda ushbu musobaqaga tayyor
ekanliklari haqida raport berar ekan,
hay'at raisi Mansurjon Rixsiyev
ishtirokchilarni qutlab, tanlov shartlari bilan tanishtirdi.

Yosh yo'l nazoratchilari «Piyodalar harakati»,
«Harakatni tartibga solish», «YTHda jarohatlanganlarga
birinchi tibbiy yordam», «Yosh velosipedchi», «Tartibga
solingan chorraha maketini yasash», «Radio to'lqinlari



XARID UCHUN CHEK OLASIZMI?

O'tgan hafta uyimiz yaqinidagi do'kondan
sharbat sotib oldim. Kechki ovqatdan so'ng uni
ichish uchun qopqog'ini ochdim. Shu payt
idishning og'zidan ko'pik chiqib, atrofga
noxush is taraldi.

Ertasi kuni do'konga borib,
sotuvchiga sharbat eskitib qolganini, u
iste'molga yaroqsizligini aytdim. Ammo
u «Sen olmasang,
boshqasi olib
ketaveradi, qani,
xariding uchun
cheking bormi?»
dedi. Men kechagi xaridim
uchun chek olmaganimdan
qattiq afsuslandim. Ayniqsa,
dadamning oldida uyalib qoldim.

Mahliyo MAMATOVA,
Qashqadaryo viloyati,
Qamashi tumanidagi
24-umumta'lim maktabi o'quvchisi



BUVIM TANBEH BERDI

Uylarni
bo'lgach,
chiqindini
soldim-da,
etagidan
anhorga
Baxtinga
ham, anhor atrofida ham
hech kim ko'rinmadi.
Ko'rsa ham nima
bo'ladi? Ko'pchilik
shunday qiladi-ku.

Uyga kirib, endi
darvozani qulflay deb
turganimda,
eshikdan
buvijonim
kirib keldilar.
Ular juda
horg'in
ko'rindilar.
– Bir

buvijon? – dedim hayron
bo'lib.

– Qizim, nega
chiqindilarni suvga
tashlading? Agar bilsang
biz ilgari shu anhordan suv
ichganmiz. Endi sen kap-
katta qiz bo'lib qolding,
gaplarimni qulog'ingga
yaxshilab quyib ol. Suvni
iflos qilish, hech qachon
yaxshilikka olib kelmaydi.

Yodingda bo'lsin,
mahalla bu sening uying,
Vataning. Uning har bir
giyohi, tuprog'i, suvini
asrab-avaylash sening,
bizning muqaddas
burchimiz. Ariqlarimiz,
atrof-muhitimiz



piyola suv ber, nafasim
bo'g'ilib ketayapti, – dedilar
hansirab.

Darhol bir piyola suv
keltirdim-da, ularga
uzatdim.

– Mana, buvijon, ichib
oling. Shu yoshingizda
sekinroq yursangiz
bo'lmaydimi, qarang,
charchab ketibsiz, – dedim
ularga rahmim kelib.

– Sekinroq yurganimda,
sening boyagi qilgan
ishingni ko'rmagan
bo'lardim.

– Qaysi ishimni,

toza bo'lsa,
mahalladoshlarimiz ham
sog'lom bo'ladi.

Men qilgan ishimdan
afsuslanib, buvijonimdan
uzr so'radim.

Aziz dugonajonlar, siz
ham mahallangizdagi
anhor, ariqlarga zinhor
chiqindilarni tash-
lamang.

Gulchehra
UBAYDULLAYEVA,
O'zDJTU qoshidagi
2-akademik litseyi
o'quvchisi

UMARBEKNING BO'SH VAQTI YO'Q

Umarbek Fayzullayev Samarqand viloyati, Narpay tumanidagi 31-umumta'lim maktabining 7-«B» sinfida o'qiydi. Ayni ta'til kunlarida u otanasiga uy ishlarida qarashyapti. Shu bilan birga, badiiy kitoblari, gazeta va jurnallar o'qish, rasmlar chizishga ham vaqt topayapti.



Umarbek vaqtini behuda o'tkazishni yoqtirmaydi. Tengdoshlaridan, hatto qo'shni uka-singillaridan ham shuni talab qiladi. Shundanmi, ustozlari, sinfdoshlari, qo'shnilarini uni hurmat qilishadi. Darvoqe, u ta'til kunlarida mahalladagi bolalarga o'qish, yozish, rasm chizishni o'rgatishni ham o'zining sevimli mashg'uloti deb biladi. Marhamat, uning chizgan rasmlariga o'zingiz baho bering.

Matyoqub NARZIYEV

BUGUNNING

BOLASI



Kuni kecha dugonam Feruzaxon mendan yaqin bir tanishinikiga birga borib kelishni so'radi. Borgan xonadonimizda bizni iliq kutib olishdi. Hol-ahvol so'rashgach, suhbatimiz o'z-o'zidan qovushib ketdi. Bu orada xonadondagi ko'zlari chaqnab turgan, 10 yoshlar atrofidagi bolakay diqqatimni tortdi.

Yigitchaning ismi Xo'jayorbek bo'lib, u Qashqadaryo viloyati, Koson tumanidagi 18-umumta'lim maktabining 3-sinf o'quvchisi ekan. Hozir ta'til bo'lgani sabab, u buvasi Keldiyor akaning uyiga mehmonga kelibdi.

Keldiyor aka nabirasidan Mirzo Bobur g'azallaridan birini aytib berishni so'radi. Xo'jayorbek buyuk bobomizning g'azalini shunday ifodali aytib berdiki, bundan beixtiyor hayratga tushdik.

Xo'jayorbek yoshligidanoq juda iqtidorli bo'lib, bunga oilada o'tkaziladigan «Kim ko'p she'r aytadi?» nomli she'rxonlik kechalari sabab ekan. U bugunga qadar yosh ijodkorlar o'rtasida o'tkazilgan «Marhabo talantlar», «O'zliging namoyon qil» nomli tanlovlarda ishtirok etib, g'olib bo'libdi. Shuningdek, iste'dodli tengdoshingiz joriy yil poytaxtimizdagi «Istiqlol» san'at saroyida o'tkazilgan «Buyuk ajdodlar vorislarimiz» konsert dasturida ishtirok etib, katta sahnada ham o'z iqtidorini namoyish etibdi.

Biz Xo'jayorbekka omadlar tilab, bu xonadondan iliq xotiralar bilan qaytdik.

Gulchehra KARIMOVA

OROMGOH KEYINGI YILGA...



«Tog' shalolasi» oromgohida dam olish maktabimizdagi har bir o'quvchining orzusi. Ulkan tog' etagidagi quyuq archazorlar orasida joylashgan bu maskanning salqin havosi jonning rohati. U yerdagi buloqlarning suvi toza, biroz qo'lingizni tutsangiz, muzlab qolganday bo'ladi. Ammo hozir sizga boshqa voqea haqida gapirib bermoqchiman.

Abror degan qo'shnimiz bu yil sakkizinchi sinfni bitirdi. O'qishlari a'lo. Biroz sho'xligiyam yo'q emas. Shunga qaramay, maktabdagi jamoat ishlarida juda faol. Mana, bir haftadirk, uning og'zi qulog'ida. Negaki, uning otasi oromgohning ikkinchi navbatiga dam olish uchun yo'llanma olib kelgan. Yana qayerga deng? «Tog' shalolasi»ga.

Nihoyat, Abror kutgan kun ham yetib keldi. Ertaga saharlab jo'nab ketishadi. U nonushtani apil-tapil qilganicha onasidan ruxsat so'radi.

— Oyi, Sobirnikiga o'tib kelay. Keyin boshqa o'rtoqlarim bilan ham xayrlashib kelmoqchi edim.

Onasining avvaliga ruxsat bergisi kelmadi. Keyin esa 5–10 kun uyda bo'lmaydigan o'g'lining ra'yiga qarshi chiqolmadi. Shunday bo'lsa-da, har doimgidek ogohlantirdi.

— Uzoq qolib ketma. Kunning issiqligini qara, boshingdan o'tib ketmasin. Yana o'rtoqlaring bilan cho'milishga ketib qolmagin.


— Bo'pti, oyijon, — dedi Abror onasi ruxsat berganidan xursand bo'lib.

Sobirning uyi qo'shni mahallada. Abror ularnikiga borganida

o'rtoq'i bog' etagidagi olcha daraxtining tepasida ekan. U do'stining kelganidan xursand bo'lib ketdi.

— Tezroq yonimga chiq, — dedi Abrorni tepaga imlab. Keyin esa oldidagi shoxga ilingan chelaklarga ishora qildi.

— Oyim kompot qaynatarkanlar, ikki chelak olchani qachon terib bo'laman,



deb turuvdim. Kelganing yaxshi bo'ldi. Terib bo'lsak, menga ham ruxsat beradilar.

Ikki o'rtoq bir zumda chelaklarni to'ldirishdi. O'zlari ham olchaga rosa to'yishdi.

Ko'chaga chiqqanlarida esa issiq zaptiga olayotgan edi. Sobir ko'yagi tugmalarini yechib yelpina boshladi.

— Azamat bilan Shuhratniyam chaqiraylik. Birgalashib Ergash buvaning o'rikzoriga o'tamiz. So'ng bog'ning orqa tomonidagi zovurda cho'milamiz.

— Mayli, — dedi Abror. — Lekin men unday joyda cho'milmayman. Oyinga ham va'da berganman. Qara, televizorda duch kelgan joyda cho'milmanglar, deb qayta-qayta aytishyapti.

— O'zing bilasan, — dedi Sobir qo'l siltab.

Ergash buvaning bog'ida to'rtovlon mazza qilib o'rik yeyishdi. Keyin esa Sobir hammani zovur tomon boshladi. Zovur suvi loyqalanib oqayotganiga qaramay, Sobir kiyimlarini yechib, suvga o'zini tashladi. Azamat bilan Shuhrat ham unga qo'shildi.

— Suv mazza ekan, cho'milsang-chi, — dedi Azamat Abrorning havasini keltirib.

— Yo'q, men cho'milmayman, — dedi Abror o'rnidan turib soyaroq joyga

o'tarkan.

— Uning onasi cho'milishga ruxsat bermaydi, — deya Sobir hovuchiga suv olib unga sepd. Uning gapi Abrorning g'ururiga tegdi. Kiyimlarini yechdi-da, o'zini suvga otdi. To'rtovlon holdan toyguncha suvda quvlashmachoq o'ynashdi.

Abror uyga kelganida onasi tushlikni tayyorlab turgan ekan. O'g'lining sho'r bosgan qo'llarini ko'rib, biroz jahli chiqdi. — Yana loyqa suvda cho'mildingmi, bolam? Qara, hamma joying sho'r bo'lib ketibdi.

Abror tezda yuvinib olib, dasturxon boshiga keldi. Onasi uzatgan kosani qo'lga olib yog'likkina sho'r vadan bir ikki ho'pladi-da:

— Ovqat yegim kelmayapti, — dedi kosani sal nari surib. — Keyinroq yerman.

Abror onasidan ruxsat olib, xonasiga kirib o'miga cho'zildi.

Kechga borib uning tobi qochib qoldi. Onasi kirganida Abror terga botganicha o'rmda g'ujanak bo'lib yotardi.

— Nima bo'ldi, bolam? Nima yeganding?

— Sobirnikida olcha yedik, keyin Ergash buvaning o'rikzoriga bordik, — dedi Abror past ovoza.

— Ishqilib, mevalarni yuvib yedinglarmi? — dedi onasi xavotirlanib.

— Daraxtdan uzib yedik, — dedi Abror og'riqdan yuzlari burishib. — Keyin zovurdayam cho'mildik.

O'sha kuni u tonggacha uxlolmay o'mida to'lg'anib chiqdi. Ertasi kuni soat to'qqizlarda ko'cha boshidagi maktab oldida turgan avtobus bolalarni olib oromgoh tomon yo'lga tushdi. Abrorlarning uyi oldida turgan «Tez yordam» mashinasiga birov e'tibor berdi, birov esa yo'q...

Yusuf ABDULLAYEV

Once there was a wise King. He had two sons. He appointed eminent scholars to teach them all arts. After few years of teaching, the King fell ill badly. So, he wanted to select his next King for his Kingdom. He wanted to test his sons' abilities.

THE RIGHT PERSON

(Story)



He called both of them and gave a room to each of them. He said, «You must fill this room completely with anything you

wish. It can be anything! But there should be no space left behind and you should not seek the advice from anyone!»

The next day the king visited to the elder son's room. The room was completely filled with hay. The king sighed on the foolishness of the elder son.

Then he went to the younger son's room. But it was kept closed. The king knocked at the door of the room. The second son asked his father to get in and closed the door again. There were darkness everywhere and the king shouted at his second son angrily. But the second son lighted a candle and said, I have filled this room with light! now the king felt very happy and

hugged his son proudly. He understood that the younger son would be the right person to rule the Kingdom after the king.


NEW WORDS:

- Appoint - tanlamoq
- Eminent - atoqli
- Select - tanlab olmoq
- Ability - qobiliyat
- Space - bo'sh joy
- Seek - so'ramoq
- Hay - xashak
- Foolishness - ahmoqlik
- Candle - sham
- Hug - quchoqlamoq
- Proudly - g'urur bilan
- Rule - boshqarmoq

IT'S A GOOD WAY OF TO LEARN ADJECTIVES AND VERBS

Look at these words and separate them into 4 groups.


Example:




O'zDJTU qoshidagi 1-akademik litseyi o'quvchisi
Nozima YO'LDOSHEVA tayyorladi

«The world is a book and those who do not travel read only one page». So my dear friends try to learn and read more and you will have more meaningful pages in your life.

Aziz o'quvchilar, biz sizlar bilan ingliz tili sahifasida antonim va sinonim so'zlar bilan tanishib kelyapmiz, keling, yana ulardan yodlab so'z boyligimizni oshiramiz.



Ushbu so'zlarning antonimlarini toping:




RIDDLE

It's an animal, similar to the horse, It has got a tail, four legs and black stripes.



Dinara SHAKIROVA tayyorladi

Nurulloh DOSTON



QO'RQMAS ULOQCHA

Dikir-dikir ulog'im,
Mening uzun qulog'im.
Yolg'iz ketding qo'radan,
Qo'rqmaysanmi bo'ridan?

– Buvam suruv serkasi,
Men-chi, uning erkasi.
Dikirlagan poshnam bor,
Bo'ribosar oshnam bor.



KO'KDA UCHUVCHILAR

Ko'kda uchar ko'p qushlar,
Turli-tuman, to'p qushlar.
Yana uchar, qaragin,
Mening ulkan varragim!



POLIZDA

Olabayroq, mallato'n,
Yastangan dala-tuzlar.
Bolalarni kutadi,
Pistirmada tarvuzlar.



NOVVOY

Katta novvoyman,
Katta ko'chada.
Bir tatib ko'ring,
Shirin kulchadan.
Buyurtma bering,
kasbim suyaman.
Quyosh taftida,
Har kun kuyaman.
Yopgan nonlarim,
Asl shirmoydan.
Hozircha faqat,
Xamirim loydan.



O'rtog'im Shoberdi bilan adirda sayr qilib yurgan edik. Shunda qayerdandir ovoz kelayotganligini payqadik. Ovoz kelgan tomonga qarab yura boshladik. Aftidan kuchuk bolasi bo'lsa kerak, degan fikr bilan u turgan joyga yaqinlashdik. Do'stim ikkimiz adashmagan ekanmiz. Chindan ham u kichkina kuchukcha ekan. Kuchukcha juda chiroyli, oq-qora rangda bo'lib, ko'ri-



OLAPAR

(Hikoya)

nishidan kimdir ataylab tashlab ketgan

edi. U biz tomon talpinib kela boshladi. Kuchukchaga juda rahmimiz keldi. Shoberdi:

– Hozir uni shu yerda qoldirsak ochlikdan yoki sovuqdan o'lishi tayin, dedi.

O'rtog'imning uyi yaqinligi sabab kuchukchani unikiga olib bordik. Unga darhol sut berib, uycha yasadik. Ertasi kuni maktabda Shoberdidan kuchukchani ahvolini so'radim. U juda yaxshi ekanligini aytdi. Men tezroq darslar tugashini, so'ng kuchukchani ko'rgani borishni xohlardim.

Darsdan so'ng uyimizga keldim va onamdan ruxsat olib do'stimnikiga yugurdim.

Kuchukcha ancha tetiklashib qolgan edi. U bilan rosa o'ynadik. Unga «Olapar» deb nom qo'ydik.

Ertasi kuni maktabga borib, o'rtog'imning kayfiyati yo'qligini ko'rib, undan xomushligining sababini so'radim. Shoberdi: «Endi Olaparni uyimizda olib qololmayman. Oyim ona tili fanidan olgan «3» bahoimni ko'rib qoldilar. «Hammasiga, dars tayyorlamay kuchukcha bilan o'ynab yurish sabab», deb Olaparni boshqa yoqqa olib borib tashla, deb tayinladilar», dedi.

O'ylab-o'ylab, Olaparni uyimizga olib keldim. Har kuni unga sut, non berib boqdim. 4–5 oydan so'ng Olapar katta bo'lib qoldi. Hozirda u bilan do'stlashib olganman. Olaparni hatto oilamizdagilar ham yaxshi ko'rib qolishganidan xursandman.

Zokir OMONOV,
Surxondaryo viloyati, Qumqo'rg'on tumanidagi 49-umumta'lim maktabining 5-sinf o'quvchisi

BOG'IMDAN GUL TERDIM

Sovg'a uchun dunyoda,
Guldan ortiq nima bor?
Bog'imizdan gul terib,
Tokchaga qo'ydim qator.

Xonamiz fayzli bo'lib,
Quvonchlarga to'ldilar.
Zavq bergan gul sababli,
Buvim xursand bo'ldilar.

O'zidek dilda ko'rkam,
Manzaralar yaratib.
Gullar ko'zni quvnatar,
Xushbo'y hidlar taratib.

Guldan bo'lak, hozir, ha,
Ne sovg'a qilsak, kamday.
Buvijonim tug'ilgan
Kun o'tsin zo'r bayramday.

Fotima JO'RAQULOVA,
Jizzax viloyati, Paxtakor tumanidagi 6-umumta'lim maktabining 4-sinf o'quvchisi



DONG'I DOSTON VATAN BU

O'z yurtimda baxtliman,
Qasr, ko'shli, taxtliman.
Ruhim baland, vaqtim chog',
Mag'rur o'zbek oiliman.

Dong'i doston Vatan bu –
Bizga faxr, chaman bu –
Farovon, soz yashaymiz,
Hurlikka jon-u tan bu.

Movi, shaffof, keng osmon,
Zaminimiz, tinch, sokin.
Yangrar mehnat qo'shig'i –
Elim yayrar, dil yorqin.

Zilol suvli jilg'alar,
Yashnab turar dalalar.
Misi jannatmonanddir,
Madhi mag'rur kuylanar.

Nomi yangrar tillarda,
Havas qilar keng jahon.
Yashar mangu dillarda,
Ona yurt O'zbekiston!

Zebuniso BO'RIYEVA,
Surxondaryo viloyati, Sherobod tumani

MENING BAXTIM

Mening baxtim erur borligim,
Omad menga doim yorligi,
Mening baxtim aql-idrokim,
Omadim, baxtim borligi.

Mening baxtim, sho'x ukalarim,
Qondoshlarim mehribonligi.
Mening baxtim, tinch-totuvlikda,
Ota-onam sog'-omonligi.

Mening baxtim gullagan Vatan,
Va farovon hayot yo'limdir.
Mening baxtim sog'dir jon-u tan,
Charchoq bilmas ikki qo'limdir.
Mening baxtim tongda yuz ochgan,
Nafis gullar boshini silash.

Mening baxtim uyqusi qochgan,
Oymomaga yorqin nur tilash.

Mening baxtim har bir kurtakda,
Ochilajak olamga boqish.
Mening baxtim ko'kka tizilib,
Turnalarga unsiz qo'l qoqish.

Mening baxtim aslim, o'zligim,
Tan olindi yurtim jahonda.
Ona xalqim, shirin so'zligim,
Tug'ilganim O'zbekistonda.

Xursanoy KARIMOVA,
Respublika ixtisoslashtirilgan musiqa va san'at akademik liseyining 9-«E» sinf o'quvchisi

ABDULQODIR 1-SINFGA QABUL QILINDI

Tahririyatimizga kirib kelgan bolakay o'zini Abdulqodir Begaliyev deb tanishtirdi. U hali yosh bo'lishiga qaramay, sport sohasida talaygina yutuqlarni qo'lga kiritibdi.

Abdulqodir bu yil poytaxtimizning Yunusobod tumanidagi 17-ingliz tiliga ixtisoslashtirilgan umumta'lim maktabining 1-sinfiga qabul qilindi. Undan erishgan muvaffaqiyatlari haqida so'raganimizda, quyidagilarni so'zlab berdi:

– Onamning aytishicha, go'dakligimda juda ko'p kasal bo'lgan ekanman. Shifokorlar onamga meni biror-bir sport to'garagiga berishni maslahat berishibdi. Shunda ular meni «Jar» sport sog'lomlashtirish majmuasi qoshida tashkil etilgan karate to'garagiga olib keldilar. Dastlab ustozimiz Jasur aka Jamilov yordamida qo'l, oyoq harakatlarini qunt bilan o'rganib, asta-sekin murakkab mashqlarga o'ta boshladim. Tuman, shahar miqyosidagi ko'plab musobaqalarda qatnashdim. Eng quvonarlisi, iyun oyining so'nggi kunlarida qizil belbog' sohibi bo'ldim,

– deydi Abdulqodir quvunch bilan.

Tengdoshingiz kelajakda ota-onasi singari shifokorlik kasbini egallamoqchi ekan.

– Shifokorlik yaxshi kasb, ammo sport bilan shug'ullanishni hech qachon tashlamayman. Kelajakda qora belbog' sohibi bo'lib, jahon chempionatida yurtim sha'nini munosib himoya qilish niyatidaman, – deydi yosh sportchi.

Biz Abdulqodirning bu gaplarini nokamtarlikka yo'ymadik, chunki bugun yurtimizning har bir farzandi yuksak orzularini maqsad qilgan. Quvonarlisi, ular kelgusida o'zlari egallagan bilim va ko'nikmalar asosida ona Vatanimizning nomini ko'kka ko'tarishga bel bog'laganlar. Biz ularning orzu-umidlari ushlishiga tilakdoshmiz.

O. TURSUNBOYEVA



– Qizil belbog' sohibi bo'ldim, – deydi Abdulqodir quvunch bilan.

Poytaxtimizda suzish bo'yicha 14 yoshgacha bo'lgan o'g'il-qizlar o'rtasida O'zbekiston chempionati yakunlandi. Unda 450 nafarga yaqin yosh sportchi g'oliblik uchun kuch sinashdi.

CHEMPIONAT YAKUNLANDI



Musobaqaning so'nggi kuni-da Go'zal Sobirova, Aziza Mir-omonova, Fotima Solih, Olga Zelinskaya, Nigora Mirzohidova, Valeriya Muratova, Komila Salimova hamda Asal Azimova shohsupaga ko'tarildi.

Bunday musobaqalar yoshlarning tajriba va mahoratini oshirishga xizmat qiladi. Kelajakda xalqaro miqyosdagi nufuzli musobaqalarda ishtirok etib, mamlakatimiz bayrog'ini yanada yuksaltirishga hissa qo'shishga zamin yaratadi.

«SAMANBOY» VA «MARKAZOBOD» LIKLAR G'OLIB

«Mahalla» xayriya jamoat fondi Qoraqalpog'iston Respublikasi bo'limi, Kasaba uyushmalari birlashmasi, «Kamolot» yoshlar ijtimoiy harakati tomonidan qator davlat va nodavlat tashkilotlari bilan hamkorlikda tashkil etilgan musobaqada 12 ta futbol jamoasi Nukus shahrida «Futbolimiz kelajagi» an'anaviy turnirining Qoraqalpog'iston Respublikasi bosqichi g'olibini aniqlash uchun maydonga tushishdi.

«Futbolimiz kela-jagi» turniri mahalla yoshlarining bo'sh vaqtini mazmunli tashkil etish, ular o'rtasida futbolni yanada ommalashtirish, iqtidorli yoshlarni qo'llab-quvvatlashga xizmat qilmoqda.

Musobaqada Nukus tumanidagi «Samanboy» ovul fuqarolar yig'ini yoshlari mahorat bobida tengqurlaridan ustun ekanini namoyish etdi. Ular 9 – 10 va 13 – 14 yoshdagi futbolchilar o'rtasida bosh sovrinni qo'lga kiritdi. 11 – 12 yoshli sportchilar o'rtasida esa To'rtko'l tumanidagi «Markazobod» mahalla fuqarolar yig'ini vakillari birinchi o'rinni egalladi.

G'olib jamoalar turnirining Xorazm viloyatida o'tkaziladigan mintaqaviy bosqichida ishtirok etadi.

Shoh MUHAMMAD



BOKSCHILARIMIZDAN 8 TA MEDAL

Yaqinda boks bo'yicha O'zbekiston yoshlar terma jamoasi Serbiyada bo'lib o'tgan «Voyevodinning oltin qo'lqoplari» nomli xalqaro musobaqada muvaffaqiyatli ishtirok etib, yurtimizga yorug' yuz bilan qaytib kelishdi. Turnirda dunyoning 24 davlatidan kelgan yosh charm qo'lqop ustalari g'oliblik uchun bahs olib bordilar.



Aytish mumkinki, bu yil o'ttiz ikkinchi bor tashkil etilgan ushbu nufuzli turnirga sportchilarimiz jiddiy tayyorgarlik ko'rdilar. Har bir vazn toifasi bo'yicha saralab olingan iqtidorli bokschilar malakali murabbiy Marat Qurbonov qo'l ostida bir nechta muhim mashg'ulotlarda ishtirok etishdi. Natijada, musobaqaga yo'l olgan 11 nafar sportchimizdan 8 nafari sovrindorlar safidan o'rin egalladi.

Jumladan, terma jamoamizning yetakchi bokschilari – Abdulhay Shorahmatov (-56 kg) va Kozimbek Mardonov (-75 kg) o'z vazn toifalarida barcha raqiblari ustun kelib, oltin medalga sazovor bo'ldi. Quvonarlisi, har ikki bokschimizning musobaqadagi ishtiroki muxlis-u mutaxassislarda katta taassurot qoldirdi.

Iqtidorli bokschilarimiz – Sulaymon Latipov (-52 kg) hamda Mahmud G'oiopov (-69 kg) ga final bahsida biroz omad yetishmadi va yakunda ular turnirning kumush medallari bilan taqdirlandilar.

Bundan tashqari, Bobirmirzo Tolipov (-60 kg), Bektimir Meliqo'ziyev (-75 kg), Obidjon Tohirov (-81 kg) va Rahmatilla G'ofurov (+91 kg) o'z vaznlarida bronza medali sohibi bo'ldilar.

Bugun shuni quvunch bilan aytishimiz kerakki, bokschilarimizning ushbu muvaffaqiyati zamirida mamlakatimizda bolalar sportiga qaratilayotgan yuksak e'tibor, Siz farzandlarimizning iqtidor va qobiliyatini ro'yobga chiqarish uchun yaratib berilayotgan shart-sharoitlar mujassam. Shunday ekan, Siz ham bo'sh vaqtni behuda sarflamay, ana shu imkoniyatlardan unumli foydalaning va sportda ulkan marralarni zabt eting.

YOSH POLVONLAR BAHSI

Yozgi ta'tilning qaynoq damlari Sizga olam-olam zavq ulashayotgan ayni damlarda ko'plab tengdoshlaringiz turli sport musobaqalarida ishtirok etib, o'z iqtidorini namoyon etmoqda. Kuni kecha Navoiy shahrida o'smirlar o'rtasida bo'lib o'tgan «Mahallamiz pahlavonlari» sport musobaqasining viloyat bosqichida ham ana shunday tengdoshlaringizdan bir guruhi g'oliblik uchun kuch sinashishdi.

«Mahalla» xayriya jamoat fondi Navoiy viloyati bo'limi, madaniyat va sport ishlari, ichki ishlar, sog'liqni saqlash, xalq ta'limi boshqarmalari hamkorligida tashkil etilgan bellashuvlarda yosh sportchilar 6 vazn toifasida gilamga chiqib, muxlislarga bir-biridan murosasiz bahslarni taqdim etishdi.

Musobaqa yakunida Navoiy shahridan Abbos Mahmudov va Muxlisa Normo'minova, xatirchilik G'ayrat Usmonov, karmanalik Kamola Aktamova, Navbahor tumanidan Gulbahor Murodova, uchquduqlik Asadullo Abdullayev o'z vazn toifalarida birinchi o'ringa sazovor bo'ldi.

G'oliblar musobaqaning respublika bosqichida ishtirok etish huquqini qo'lga kiritdi.

Sa'dullo TURSINOV



«O'zbekiston»
NMIUda chop etildi.
Tahririyatga kelgan barcha
qo'lyozmalar tahrir qilinadi,
mualliflarga qaytarilmaydi.
Haftaning dushanba kuni
chiqadi.
Shakli A-3, 2 bosma taboq.
ISSN 2010-6092
Adadi – 30967
Buyurtma – S 443